

Date : 28 Disember 2017
Title : Finishing School bantu persediaan pelajar masuki pasaran kerja
Publication : Berita Harian
Page : -V50

Finishing School bantu persediaan pelajar masuki pasaran kerja

Bangi: Bagi meningkatkan kebolehpasaran graduan, Universiti Tenaga Nasional (UNITEN) melancarkan program Finishing School yang menerapkan kemahiran insaniah terhadap pelajar tahun akhir sebagai persediaan memasuki alam pekerjaan kelak.

Timbalan Naib Canselor (Hal Ehwal Pelajar dan Alumni) UNITEN, Prof Dr Mohd Zamri Yusoff, berkata program diperkenalkan tahun ini memberi tumpuan kepada mereka yang tiada menerima pembiayaan pendidikan daripada mana-mana industri berbanding pelajar tajaan mempunyai peluang kerjaya lebih cerah bersama syarikat penaja.

"UNITEN bekerjasama dengan pihak industri bagi menjayakan program ini. Satu ujian khusus dijalankan bagi mengenal pasti kecenderungan pelajar dalam suatu bidang itu kerana adakala mereka tidak menyedari akan kebolehan atau minat diri dalam industri berkenaan.

Beri panduan
"Hasil keputusan akan dikongsi dengan pelajar, diikuti sesi perbincangan lanjut bagi memberi panduan dalam pelbagai aspek, termasuk cara menghadapi sesi temu duga pekerjaan dan peningkatan kemahiran insaniah dalam kalangan bakal graduan itu," katanya ketika ditemui di sini, baru-baru ini.

Selain itu, UNITEN komited meningkatkan kebolehpasaran graduan dalam bidang keusahawanan dengan menubuhkan Pusat Keusahawanan tahun lalu yang menyaksikan sebanyak 5.2 peratus pelajar universiti

itu bergelar usahawan tahun sama.

Prof Mohd Zamri berkata, ciri keusahawanan seperti bijak merancang, berpengetahuan dalam aspek kewangan, mempunyai pelan perniagaan dan misi jelas, bersungguh-sungguh dan rajin, bukan sahaja berguna kepada pelajar ingin bergelar usahawan tetapi juga boleh menjadi kelebihan bagi yang memohon pekerjaan kelak.

"Bagi yang mahu bergelar usahawan, UNITEN memberi geran SPROUT RM6,000 kepada pelajar layak dan ingin menjalankan perniagaan dalam tempoh pengajian," katanya.

Karnival kerjaya

Seterusnya bagi merapatkan lagi hubungan sesama alumni dan memudahkan pelajar membina rangkaian kerjaya, beliau berkata,



FOTO AIZUDDIN SAAD / BH

Pelajar mengunjungi Karnival Kerjaya UNITEN 2017 bagi mencari peluang pekerjaan dan tempat menjalani latihan praktikal.

info

Finishing School UNITEN

→ Seramai 30 pelajar menjayakan program sulung

UNITEN menubuhkan Portal Komuniti Alumni yang bakal memberi manfaat kepada pelajar dan 27,000 alumni universiti itu.

"Portal ini bertujuan membina rangkaian dalam kalangan alumni, graduan dan pelajar UNITEN untuk saling berkomunikasi, bertukar pandangan dan berkongsi maklumat mengenai jawatan kosong ditawarkan syarikat milik alumni atau program pembangunan kerjaya lain," katanya.

Dalam perkembangan

lain, UNITEN menganjurkan Karnival Kerjaya 2017, baru-baru ini, membabitkan penyertaan 70 syarikat bagi membantu pelajar mencari kerja dan tempat menjalani latihan praktikal serta sebagai platform untuk majikan mendapatkan tenaga kerja.

Karnival yang menjadi acara tahunan UNITEN sejak dua tahun lalu itu dirasmikan oleh Timbalan Ketua Setiausaha (Pembangunan) Kementerian Pendidikan Tinggi, Datuk Nik Ali Mat Yunus.